

非古也三年之後當祔於廟真殿可革必不得已而為之則當依其法素食可也 上曰婦女未祔之前豈無致祭之禮歟

於佛家置真殿則宜用素食矣別立其室則宜用肉也但以其平日所嗜魚肉脯醢等物薦之○癸未 太上王親奠于 啓

聖殿遂入舍利殿禮佛 啓聖殿即 桓王真殿也○夜寅卯

方有赤氣○定禮葬贈謚之法司憲府上疏曰竊謂國家於大臣之沒其曾經政府者不論時散並以禮葬之此報功之道而忠厚之至也然法當垂於萬世不可不謹其始也若必以位經政府者禮葬之則臣未知萬世之下其皆用賢而有功者授政府之任乎請以近事陳之門下侍郎贊成事金湊叅判承樞府事崔雲海其沒適在一時朝廷於湊則葬以中例臣愚未審湊為贊成有經綸輔治之勲歟有戎馬定遠之勞歟雲海則征伐四陲身親矢石攘狄安民戍塞撫卒之勞國人所共知也而反未蒙賜謚禮葬之恩全羅道水軍都節制使金贊吉恒居水上為國長城捍禦海盜其不家居治生者三十餘年心常懸於